



*Rabu, 08 September 2021*  
**Ogen: Esekiel 15:1-8**



**Lebih La Erguna**



**I**bas Pustaka si Badia bangsa Israel megati iandingken Tuhan selaku batang anggur. Batang anggur e, batang belinna ngenca lit pergalangna, cabang ras rantingna kitik ras menipes. Ranting-ranting e me ingan buah anggur e turah, kenca iperani buah anggur biasana ranting e jadi kerah. Labo lit kegunanna si deban, seakatan menyalurken nutrisi arah urat ras batang belinne. Labo ka ia bagi taruk jambe ntah ropah si banci ban jadi gulen. Man perjuma anggur, ranting-ranting si kerah e, perban lanai lit gunana igunting janah ibenterken ku api.

Bageme Tuhan ngandingken bangsa Israel si mersik ukur ras nundalken Tuhan. Bangsa Israel e me ranting anggur ndai. Sanga ersada pe ras Tuhan la teridah buahna, tapi ban perkuah ateNa ibentuk dingan ipekena-kena Tuhan seh maka jadi pujin bangsa-bangsa. Tapi kinigajangen ukur, pusuh si mendua, lanai diatena Tuhan si nggo mpesikapsa. Lanai begina sora Tuhan, beluh akapna bana ras tempa-tempa lanai ia perlu man Tuhan. Emaka ikiraken Tuhan me bangsa e desken ranting anggur si nggo meseng. Utuh denga pe ia labo banci ipake jadi kai pe, gundari enggo jadi abu, man kai nari, lebih la ergunana ilebe-lebe Tuhan. Desken sekalak perjuma si la rani buah sinuan-sinuanna, arus me icilukna batang sinuan-sinuan ndai kerina maka banci suan sinuan simbaru. Tuhan ngukum bangsa e alu nciluk kuta Jerusalem, kuta kemulian Dibata, kuta kebanggan Israel.

Tuhan kap sinepa kita, IA si mada geluhta, arus tetap si inget e kerina. Nggeluhlah kita erkemalangen man Tuhan, ola si akap pentar banta lebih asa patutna, geluhta arus erbuah erpalasken kiniteken man Tuhan. Batang ara si la erbuah pe sumpahi Tuhan, piah erbuah pe atena lanai dorek. Erbuahlah kita, asa lit kesempatan cidahken buah kiniteken e. Sabap arah buahna itandai batangna.